

# Eutanasia

Nos kachó a wèrp. Poko dia despues un di e ocho yunan a haña un bulto grandi na banda di su kabes. Konstantemente el a keha di dolor. Mi a sinti duele pa e kachó chikitu. Porfin mi a tuma kurashi i a hib'é mondi i a terminá su sufrimentu. Esei a parse e kos mas miserikòrdioso ku mi por a hasi pe.

Ma kiko nos por hasi ora un hende ta sufri doló konstante, òf tin un malesa di kua e no por kura? Segun opinion di hopi hende, e kos mas miserikòrdioso ku por hasi pe ta pa laga un dòkter pas'é un angua ku lo terminá su bida.

Ta parse ku nos mama pais ta hañ'é mashá normal pa mata un ser humano pa aliviá su sufrimentu. Ta kalkulá ku médikonan hulandes intenshonalmente ta mata 3000 persona kada aña, maske e práktika ta ilegal. Eutanasia a bira asina komún na Hulanda na febrüari, 1993 nan a disidí di legalis'é. Kuantu mas hende lo muri na man di médikonan awor ku Hulanda ta e pais ku leinan mas liberal di eutanasia? Teorètikamente ainda ta ilegal pa un dòkter hulandes yuda un pashènt muri. Ma si e médiko notifiká outoridatnan di su "matamentu miserikòrdioso" lo e no wòrdu enkarselá. Tambe e mester tene kuenta ku sierto regla: a) e pashènt mester ta bon di kabes, b) e pashènt mester pidi eutanasia varios bes, c) e pashènt mester ta sufriendo di dolor insoportabel, d) e dòkter mester konsultá ku un otro médiko promé ku e por terminá bida di e pashènt.

E desaroyonan aki ta preokupante pa nos na Antia. Sin duda e legalisashon di eutanasia na Hulanda lo afektá nos na Boneiru. Mas i mas hulandes ta bin establese nan mes na nos isla i indudabelmente dia lo bin ku un di nan lo pidi nos médikonan pa aliviá su sufrimentu di e forma aki. Tin hopi médiko hulandes na Antia i sin duda tin den nan dòkternan ku por pasa un pashènt un angúa venená sin ku su kurpa ta kohe rel. Ademas, hopi di nos médikonan antiano a haña nan enseñansa na Hulanda, i talbes a wòrdu endoktriná pa dosentenan pro eutanasia.

Eutanasia ta introdusí hopi problema serio. E ta kontradisí e propósito di e profeshon médiko pa kura i preservá bida. Ku eutanasia e dòkter ta bira tantu kuradó komo matadó di hende. Si bo ta un pashènt sin salú lo bo no ke mira un dòkter ni pintá, pasobra kisas na lugar di kurábo su intenshon ta pa pasabo un angua mortal. Lo bo no por konfia bo dòkter. Tambe médikonan sa hasi fout. Kisas un dòkter su diagnósis kiboká ta indiká ku su pashènt tin un malesa terminal. E persona keriendo ku e lo sufri un morto doloroso ta opta pa eutanasia--un morto sin nodi. Legalisashon di eutanasia ta kousa otro problema. Lo e pone preshon riba e pashènt ku ta realisá ku e ta un karga emoshonal òf finansiero pa su famia pa terminá su bida pa aliviá nan. Tambe e ta hasié mas fasil pa un hende ku tendensia di suisidio pa evitá di trata ku su problemanan personal, i skohe un ruta muchu mas fásil: deshasí di su bida.

Ma tin problema mas serio ku eutanasia. Si hende ta solamente un bestia ku ta mas desaroyá, manera evolushon ta siña, anto por hasi ku hende meskos ku mi hasi ku mi kachó. Ma Beibel ta bisa ku "Dios a krea hende segun Su mes imagen" (Genesis 1:26-27) i pesei tur bida humano (asta bida di esun den koma) ta sagrado. Pesei un di e dies mandamentunan ta bisa "No mata" (Exodo 20:13), un mandamentu ku "matamentu miserikòrdioso" ta violá. Proponentenan di euthanasia ta enkurashá hende pa "muri ku dignidat." Nan ta bisa "Abo por mester disidí ki ora bo ta muri. Si bo sa ku bo ta bai bira vèrkalk, pèrdè abilidadat pa pensa, no tin kontròl riba bo fakultatnan físiko, mihó bo skohe pa muri ku dignidat ora bo ta bon ainda na lugar di pasa den tur e bèrguensa i sufrimentu ei." Ma Dios so ta Esun ku ta duna bida i E so tin derechi di tuma e bida bèk. Ta ken hende ta ku nan por pretendé di sa mehor ku Dios?

Tin un motibu mas pa rechasá eutanasia. Tin pashènt ku ta sufri hopi. Ma nos ta kere un mentira si nos ta pensa ku eutanasia ta e solushon pa su doló. Un persona ku ta nenga rekonosé ku e ta un pekador, ta nenga bandoná su piká, i ta nenga konfia i invitá Hesu-Kristo pa skap'é di e kastigu di su piká, Beibel ta bisa ku e lo pasa etèrnidat na fièrnu, sufriendo muchu mas doló ku el a eksperensia den bida. Mihó bo pensa serio tokante bo destino etèrno, i aktua awor mientras bo tin bida, pasobra despues di morto no tin mas chèns.